

Scaza

Scaza, 'ncapu un mantu di nivi,
mentri camini mezzu l'arbuli d'ulivi
vannu jettannu davanti a li tò pedi
petali di rosi russi senza chi si cedi.

La luna 'mmezzu li nuvuli di notti
fa luci a natri 'nnammurati cotti
tinennuni stritti n'accarezzamu
mezzu la nivi l'amuri fistiggiamu.

Cu la testa pusata 'nì lu tò pettu
mi voto e mi rivotu 'ni lu lettu,
m'addivigliavu e capivu ca unn'era rialtà,
ristavu cu l'occhi chini e nenti mi ristà.

Patri

Tutti cosi rifacissi, lu patri nò.
Tanti duviri, mancu un dirittu,
accostu ca murissi di pitittu.

Comu nascinu già ha piccatu
nun s'è rispittatu, né amatu
e nuddu mà t'ha ringraziatu

Li sfami, ti lu levi di 'mmucca,
mancu chissu pi iddi è graditu
si sbagli, si l'attaccanu a ghitu.

Cu l'occhi chini di lacrimi,
lacrimi ...
lacrimi ...

di vatri nun mi fazzu vidiri,
chiangiu sulu, a l'ammucciuni.
e pregu a Diu a dinucchiuni.

Figli, cari figli, figli beddi,
mi stancavu di chiangiri,
e 'ncelu mi nni vogliu iri

Tu sulu, Patri, mi pò capiri,
sugnu patri, e puru tò figliu,
levami, si pò, di 'stù scumpigliu.

Sciallu rüssu

M'affacci cummigliata finu a lu mussu
di un sulu granni sciallu di sita rüssu.

Ti scummogli, ti cummugli e m'immiti
a lu piaciri pi saziari la tò putenti siti.

T'accarizzu. Li mani acchiananu e scinninu,
di 'nn'abbrazzata li nostri corpi si funninu.

Squàgliati di piaciri lu tempu nun videmu
di la matina finu a notti d'amuri gudemu.

Lu viniceddu

Acchianannu 'ntà nà cullinedda
e si vidi lu celu cu lu mari vasàri,
chista è la nostra Sicilia bedda
ca sulu natri sapemu amari.

Li viti chiantati diritti a filagli,
lu viddanu li zappulia cu amuri
a la vinnigna restanu li guadagni
e si scordanu faticchi e suduri.

Lu suli forti cannaria d'estati,
coci li grappuli ca penninu durati,
li coccia su beddi niuri e vellutati
fannu vèniri la 'mmidia a tutti li stati.

Sutta n'arbulu d'aulivi lu curtivaturi
cu nà fedda di pani e tecchia di cumpanàggiu
mangia e ringrazia lu nostru Sarvaturi
pi daricci saluti, forza e tantu curaggiu.

Quannu li macchinarii mancavanu,
fimmini, masculi, amici e parenti
scazi dintra un tinu mentri abballavanu
la racina scrapisavanu cuntenti.

Di lu 'ccippettu sculava lu viniceddu
chiaru, gustusu, simplici e frizzanti
si lu pò viviri puru un 'nuccinteddu
ma si ssi esagira fa cadiri un giganti.

Cu fù, cu li spirtizzi, ca 'mbriacà a Pulifemu
passannucci sutta la panza e lu dinocchiu?
Fù Ulissi cu li compagni ca lu pigliaru pi scemu.
Pi lu vinu, lu giganti cci appizzà l'unicu occhiu.

Lu superchiu rumpi lu cuperchiu,
'ni tutti li cosi ci voli l'autucuntrollu,
cchiù attentu s'ava stari quannu è vecchiu,
parti pi la testa e si perdi lu cuntrollu.

Lu vinu duna forza a li malati,
cura la menti e li mali radicati
perciò un bicchiireddu di vinu a lu jornu
leva malincunii, malatii e medici di tornu.

L'urtima foglia

Cu tristizza e senza piaceri,
passanu matini, jorna e siri.
Lu suli affaccia lucenti e beddu,
codda a mari senza un surriseddu.

La luna narrè li nuvuli s'intreccia
di l'amuri v'accurzannu la meccia
passanu notti senza cchiù 'nà festa
ora capisciu, chiangiri mi resta.

Cu l'occhi ancora vagnati di chiantu,
pensu lu passatu amuri ch'era tantu.
Ormai haju lu cori votu e stancu,
a nuddu mi trovu a lu mè fiancu.

Suliddu ristavu cu lu cori friddu.
M'arristà sulu n'amicu,.....sulu Iddu.
Lu supplicu, ma nun senti li mè canti,
vulissi stari cu Iddu e li sò santi.

L'autunnu fici càdiri li fogli.
Spizzà, puru l'amuri e l'imbrogli.
Li gioi, li carizzi, li vasati
sunnu ricordi ormai trapassati.

Sciuscita ancora forti pi strappari
l'urtima foglia 'npinta pi 'n accurdari,
fra li mani la tegnu comu 'nà stidda
a dinucchiatu 'nterra pregu pi idda.

Oh! Cristu

Oh! Cristu Onnipotenti,
pensa pi 'sta nostra terra.
Cumminci a 'sti putenti
a nun fari cchiù guerra.

Di sordi e di palazzi
nun n'hannu cchiù chi fari
chi vonnu ancora 'sti pazzi
lu suli, celu e mari?

Tra droga e ammazzatini,
nun si pò cchiù campari,
si mori tutti li matini,
nun serbi cchiù prigari.

Dàticci paci senza 'ngannu
amuri, fidi e sirinità,
sarà festa tuttu l'annu
pi l'interà umanità.

Lu mè paisi

Prestu mi susu ogni matina,
grapu porta e parmisciana
beddu suli trasi e aria fina,
vinticeddu di tramuntana.

Magazzolu, Platani e Verdura.
'Mmezzu 'stì sciumi c'è Ribera,
è terra ca lu viddanu adura
è lu vantu di la natura vera.

Di la Viradura a la Pirrera,
di li Musiti a Siccagranni
sciurisci lu paisi di Ribera
cu aranci e frutti tutti l'anni.

Li sciavuri eccellenti
si la fannu tutti a gara,
sempri idda è la vincenti
è la nostra bianca zagara.

Di Rivela l'aranciu è lu vantu,
pari lu suli 'mezzu li viridi fogli
è un piaceri pì cù l'ha mangiatu.
è friscu, duci appena chi si cogli.

Chi diri di li fimmini rivilisi:
tutti beddi fini e 'ntilligenti,
di famiglia bona, su burgisi,
laureati e tutti indipendenti.

Di 'stu paisi allegru e fistanti,
tanti cosi ci fussiru di diri
li biddizzi di Rivela sunnu tanti.
si nun ci criditi viniti a vidiri.

Cari furasteri, allura vi dicu:
firmativi a Rivela e respirati,
l'aria fa beni puru a lu nutricu,
è miraculosa e cura li malati.

Lì mè anni

M'addivigliu e semu a la dritta,
pari strammu, ma è cosa naturali
iu restu vigliu, iddu si la slitta
è la natura di li poveri murtali.

Ancora nun sentu li mè anni,
sugnu sempri comu un picciottu
caminu e curru senza affanni
ristari giovani è lu mè mottu.

Currennu puru passanu li jorna
nun n'haju cchiù li mè trent'anni
lu passatu cchiù nun ritorna
vidu passari lesti li mè anni.

Picchì, Santu Diu, nun si fermanu!
Fussi bellu ristari comu sugnu,
piaciri, ardiri nun si carmanu
picchè dopu a essiri un cutugnu?

Lu munnu accussì avà ghiri
si nasci, si crisci e si mori,
chi vò pì nun mi fari 'micchiri?
Dimmillu! Ti dugnu puru lu cori!

E' 'nutuli nun c'è nenti di fari,
nuddu pò canciari la nostra sorti
nun bastanu sordi di putiri pagari
lu prezzu pi scacagnàrisi la morti.

Allura amici cari vi dicu,
circamu di viviri e cantari
la vita è 'na mangiata di ficu
futtemuninni! Tiramù a campari.

Prighiera

Addinucchiatu 'nterra
a li pedi di 'sta cruci,
pregu a tia Cristu
pi darimi un segnu di paci.

Ti pregu cu amuri,
dammi fidi comu a l'atri,
pi cridiri a tia, Signuri,
e l'Onniputenti Patri.

'Nchiuvatu,
cu la curuna di spini 'n'testa
n'sanguliatu, fragellatu,
ti ficiru la festa.

Oh! Cristu, nuddu
di tia appi pietà;
t'ammazzaru
nun canuscennu la virità.

La Matruzza
a li tò pedi chianciva,
cu li lacrimi
li chiaghi ti vagnava.

Dispirata a mani giunti
gridava: nun muriri!
Sarva 'stu munnu,
nun t'inni iri!

La luci di lu suli 'ntra jornu,
tuttu 'nsemmula s'astutà,
lu celu si vistì di niuru,
tuttu lu munnu trimà.

Lu poviru Crucifissu
sfinutu, senza sciату,
isà l'occhi 'ncelu
e lu Patri ha 'mpluratu.

Lampi, trona,
acqua e ventu;
l'occhi chiudisti;
pi tutti fù un turmentu.

Mortu ti scinneru di la Cruci
c'un linzolu e dù scali a lu latu
'mbrazza ti piglià la povera Matri
stringennuti a lu cori scunsulatu.

Sistimatu 'nta lu sipolceru
l'Addulurata Matri la facci ti vasà,
facennusi la cruci dissi:
sia fatta la tua volontà.

Dopo tri jorna a Gerusalemmi
ci fù un gran scumpigliu
gridavanu tutti:
abbriviscì lu figliu!

"Gesù mortu ammazzatu
è risuscitatu"
Ora sedi a la destra
di lu Patri tantu amatu.

Ti ringraziu Cristu ca mi pinzasti
la fidi ca nun avia tu mi dasti.

'Nà vasata

Ah! Si putisi dari 'nà vasata
a chidda ca haju sempri 'ntesta;
la notti mi sonno la sò risata,
lu jornu la sentu ed è 'na festa.

La stringissi forti a lu mè pettu
taliannula diritta 'nta l'occhi,
la vuccuzza ccì vasassi cu rispettu
e la sottana ccì riissi a lì dinocchi.

Lu sò sapuri sarvassi rasu-rasu
nnì la mè vacca, nnì lu mè palatu,
lu sò profumu nnì lu mè nasu,
l'amuri nnì lu cori ammucciatu.

Di tuttu chistu idda nun nnì sapi nenti,
lu ventu porta luntanu li mè sentimenti,
vicinu la vulissi pi essiri contenti
campassi pi idda e libirassi la mè menti.

Menu mali ca haju tutta 'sta fantasia,
nun fazzu nenti, ma scrissi 'sta poesia.

L'omu

'N'omu
mi dissi:
pirchè tu si filici
jochi e canti
e iu no?

Pirchè?... Pirchè!
Tu si omu e iu no!
Iu haju l'ali e tu no!
Iu volu e tu no!
Iu sugnu libiru e tu no!

Pi mia nun ci sù
nè chianuri,
nè muntagni,
nè mari, ne celi,
unni piaci a mia vaju.

Tu 'nveci,
prima di catamariti
a chiediri
"PIRMISSU".

Unni a ghiri,
chi a fari,
comu t'a vestiri
e comu a mangiari

Lu capisti ca si nuddu
ammiscatu cu nenti!
E di la bedda vita
nun 'nà caputu nenti!

Talia a mia,
talia comu volu.
Volu a mari,
'n celu, a lu sciumi,
'n capu 'na rosa.

Pi forza a essiri
filici e contenti!
Nò comu a tia!
omu di...

Bum! ... Bum! ... Bum! ...

Ti spararu!
T'ammazzaru!
Arraggiuni aviату:
veru nuddu sugnu.

Accussi semu!
Senza pietà.
Èratu filici e contenti
l'omu la vita ti livà.